

29898

14

掌銓題稿

卷三十四

世爵襲職



掌銓題藁目錄

卷之三十四

題黔國公沐昌祚襲爵疏

題南和伯方擘襲爵疏

題行查建平伯孫高添爵疏

掌銓題藁卷之三十四

襲爵

照常處者不錄

題黔國公沐昌祚襲爵疏

驗封清吏司案呈奉本部送准兵部咨內
開雲南撫按官陳大賓等會題稱原任鎮
守雲南總兵官征南將軍黔國公沐朝弼
屢次被論虐害莊民及近日固留母嫂等
項事情俱已會勘明白欲將伊男沐昌祚
承襲祖爵該兵部覆議沐朝弼仍乞

天語叮嚀重加戒飭令其省改伊男沐昌祚應

否准襲合咨吏部徑自擬議題

請等因奉

聖旨是欽此欽遵備咨到部送司又該鎮守雲南總兵官征南將軍後軍都督府都督僉事沐昌祚奏稱自臣始祖沐英奉

命世守雲南二百年矣子孫相繼承襲黔國公

掛印充總兵官鎮守地方至嘉靖十五年

臣祖沐紹勛在鎮病故臣伯沐朝輔年方

一十歲臣父沐朝弼方六歲撫按看得本

鎮難以缺官將伯朝輔係祖長男不候出

幼止年十歲襲黔國公充總兵官掛印鎮

守歷任九年病故二子患病夭亡屢經多

官會勘明白於嘉靖三十三年臣父沐朝

弼承襲公爵掛印鎮守隆慶三年父因患

病不便管事退任自陳又該言官論劾猥

蒙

聖恩矜憫閒住復蒙雲南撫按查臣係嫡長親

男見年十四歲奏保暫令代管地方事務

本年五月初三日臣父聞接邸報望

闕謝

恩閉門養病訖一應軍務大小事情盡付臣管
隨蒙巡按劉御史見臣名雖代鎮無有官
爵恐悞事機具題量授職銜管領鎮守事
務待沐朝弼勘明無礙承襲祖爵等因隨
蒙吏兵二部會題覆奉

欽依授臣都督僉事掛印代鎮臣欽遵代鎮管
事半年以來孰料各該土流見臣是都督
僉事職銜所來文移多不以臣爲意每肆
忽略臣揣祖爵未承自亦相體但遐遠極
邊外番環列性習犬羊朝改夕更比之腹
裏附近軍民不同臣父自奉

明旨養病閒住另居一府地方機務全不干預
今年二月間犯人蔣旭等已經捕獲見今
撫按衙門究問擬罪祖母李氏年老伯母
陳氏見在屢經三司府縣衛所女醫官婦
眼同驗有足疾親口稱說不願往南是的

多官申請撫按議令留滇養病莊田行各
有司徵收父之前事會勘已明各無干礙
緣臣都督之銜未能動制諸臣自臣祖世
守雲南遠在萬里百凡文移干係邊情如
無黔國公正銜書載實被眇視伏思臣父
既經養病謝事公爵懸缺撫按以臣係嫡
長親男奏保掛印代鎮若不承襲祖爵實
難鎮壓地乞

勅吏部俯查臣伯沐朝輔臣父沐朝弼承襲事
例早賜題

請容臣就被襲爵鎮守邊境等因奉

聖旨吏部知道欽此欽遵抄出到部送司查得
嘉靖十五年閏十二月內該雲南撫按官
胡訓等奏稱黔國公沐紹勛病故乞要將
應襲舍人沐朝輔比照沐崑事例就被承
襲祖爵等因該本部覆奉

世宗皇帝聖旨沐朝輔既年幼免赴京准襲黔
國公着就被掛印充總兵官鎮守雲南地方

寫勅與他一應地方事情暫令巡撫都御史處分欽此又查得嘉靖三十三年三月內該欽差工科給事中曹禾等查勘黔國公沐朝輔妻夫人陳氏具奏情節已經勘明乞要將沐朝弼承襲等因該本部覆題節奉

世宗皇帝聖旨這事情既勘議明白沐朝弼領鎮已久着襲封黔國公照舊鎮守地方欽此又查得隆慶三年七月內准兵部咨該兵科都給事中張鹵等參論沐朝弼前項緣由覆奉

聖旨是沐朝弼革了任閒住鎮守事務着伊男沐昌祚暫管其餘依擬欽此續准兵部咨該巡按雲南監察御史劉思賢題稱乞將沐昌祚量擬職銜責領鎮務該本部會同兵部議將沐昌祚量加都督僉事職銜暫領掛印充總兵官鎮守雲南等處地方待伊父沐朝弼勘明無礙方許赴京另

請襲爵題奉

欽依移咨都察院轉行彼處撫按衙門通行欽遵去後今該前因通查案呈到部看得雲南撫按等官陳大賓等俱奏沐朝弼所犯事情會勘明白沐昌祚應准承襲及沐昌祚奏要比例就彼承襲各一節爲照原任黔國公沐朝弼過雖多端孽由自作旣經撫按官會勘明白委於祖爵無礙至於就彼承襲亦有沐朝輔等前例可援而沐昌祚見領鎮務又難遠離相應題

請合候

命下准令沐昌祚照依沐朝輔等事例免其赴京給與

制勅就彼襲爵掛印充總兵官鎮守雲南等處地方仍

諭以勉修行履痛蓋父愆緩輯民式光祖烈庶有罪無罪處之各得其宜而爲

恩爲威施之各得其當但爵典出自朝廷臣等未敢擅便伏乞

聖裁等因隆慶四年五月二十一日題二十三
日奉

聖旨沐朝弼事情既會勘明白沐昌祚准免赴
京襲黔國公着掛印充總兵官鎮守雲南地
方寫制勅與他

題南和伯方擘襲爵疏

驗封清吏司案呈奉本部送准刑部咨問
得犯人方輝年四十二歲係直隸滁州全
椒縣人自幼忝順天府宛平縣居住狀招
輝有高祖方瑛景泰年間擒獲苗賊有功
進封南和侯世襲伯爵故曾祖方毅襲方
毅生已故嫡長子伯祖方壽祥及已故祖
方壽柱方毅故方壽祥承襲於成化年間
娶已故

誥封夫人劉氏生已故襲爵長男方東并已故
次男方來劉氏帶有從嫁女荷花兒卽何
氏於弘治十四年九月初六日生已故男
方禾後方東病故伊男方炳承襲生已故

男方應奇方禾娶正妻張氏於嘉靖十五年六月初七日生今在官嫡長子方擘比方炳因男方應奇年幼見得方擘長成每年分與俸銀二十兩庄米二十八石八斗被別卷已問結妹夫徐必邁不容方擘關支前項銀米訐告南京刑部各問不應罪名聽叅具題間遇蒙

赦宥釋放訖至隆慶元年二月內方炳取回北京管事有方炳不在官繼母徐氏相隨前來本年九月內方炳病故徐氏與孫方應奇一向相依輝家同居至隆慶三年正月內方應奇出痘身故遂致嫡枝絕襲嫡次子方來先年早故無嗣前爵該庶長孫方擘承襲徐氏隨令家人方福前往南京報取方擘前來承襲間比因路遠未到是輝不合要得攬襲前爵就設計對徐氏在官家人方祿說稱你我大家用心唆哄伯母尋些事故阻住方擘扶持我襲了伯爵重

重報你等語伊亦不合依聽就捏稱方禾原係還俗尼僧何氏所生方禾三子方曄方燦方炯俱不修飾行止屢經告犯不應襲爵止有方壽祥弟方壽柱生方采方采生方燿見存相應承襲等項虛情向徐氏日夜蠱惑以致徐氏輕信方祿又不合與令徐氏出名具本就替伊抱赴通政司投下奏行間方曄隨亦將應襲緣由具奏通行吏部轉行南京右府查勘蒙府會同南和伯親族鄰佑見證人等在官方繼祖周氏等將方曄應襲事情保結到部又該徐氏方曄復奏前事隨蒙本部備行右府再四覆查與前無異及審據曄已故親兄方燿今在官男方應垣方應埜執稱伊父方燿爲長方燿爲次其方壽祥所占尼僧一節年遠無憑查據各緣由開送到部又准通政司送據徐氏及方曄通狀到部隨蒙本部將徐氏先後所奏一千人卷通行查

叅具奏移咨到部送司將方曄方輝并一
千人證行提前來研審各情明白蒙看得
南和伯方瑛之後惟方壽祥爲嫡派長枝
今方禾旣壽祥親男方曄又方禾長子嫡
長方東之世已絕則庶長方禾之子應繼
明矣何氏縱係還俗尼僧查律無禁且衆
執成化年間從嫁又爲可據方輝旣壽祥
弟壽柱之旁枝又壽柱男方采之次子乃
敢明謀承襲明係攙越法紀難容及審方
祿抱奏各項事情俱係虛捏罪亦難追除
將方曄方繼祖方策方烱方應垣方應埜
隨審外將輝等各問擬應得罪名贖罪完
日寧家告實方曄送回吏部准令承襲南
和伯卷查前事先該吏部將方曄應否襲
爵緣由備行南京右軍都督府查勘該本
府掌府事永康侯徐喬松查審得方曄實
係方炳親叔方禾與嫡妻張氏所生長男
係周氏收洗及叔祖母朱氏在旁知見並

不係疎遠旁枝及乞養異姓尼僧奸生之
子方炳方應奇相繼故絕應該方擘承襲
及查方擘事犯止因方炳存日每年分給
方擘銀米被妹夫徐必邁霸占訐告遇

赦亦無違礙重情備咨右軍都督府續准本府
將取到宗圖供結粘連送至驗封司隆慶
五年該徐氏復奏前事蒙行本府覆查該
本府掌府事定國公徐文璧左右僉書新
建伯王正億豐潤伯曾文炳再四詳查回
稱承襲南和伯爵方擘爲近方應垣次之
方擘果無違礙應准承襲等因又准通政
司送據徐氏方擘通狀告同前事通行案
呈本部蒙看得世爵承襲先須由嫡以及
庶然後由親以遠疎今南和伯方壽祥之
孫方炳故絕則壽祥之孫方擘應襲前爵
固非方輝係壽柱之孫者所得而訐爭也
方炳之母徐氏奏方擘曾犯罪過旣已查
明遇宥無容別議又奏方擘之父方禾乃

壽祥之妻何氏所生以其曾爲尼僧不應承襲事經年遠累查未已臣等以爲議襲壽祥之伯爵者不當查方擘之父是否尼僧所出但當查何氏之子是否壽祥所生使方禾非壽祥之子則方擘雖不係尼僧傳生亦難准襲使方禾果壽祥之子則方擘雖係尼僧傳生亦不復論再照世爵承襲自有一定倫序近來奸頑不畏法度紛紛爭訐不特一輝擘輩已也若不議處何以示懲合候

命下本部將徐氏先後所奏一千人卷通行咨送法司查審應襲者准令承繼前爵妄奏者究擬應得罪名庶法紀明肅而人心亦知警畏矣等因具題奉
聖旨是欽此欽遵抄部送司將方輝等問擬前罪具本送大理寺審允奏奉

聖旨俱依擬欽此欽遵允報到司除將方輝方祿各發落外所據方擘應該承繼伯爵合

連原卷一併咨回等因備咨到部送司案
查前事先該徐氏方曄等節次奏告累行
查勘纏擾未結既經題奉

欽依咨送法司查究去後今准前因檢照諸司
職掌內開凡授封官身死須以嫡長男承
襲如嫡長男事故則嫡長孫承襲如無嫡
長子孫以嫡次子孫承襲如無嫡次子孫
方許庶長子孫承襲及查得見行事例公
侯伯子孫承襲俱行該府保勘無礙方與
奏

請定奪通查案呈到部看得已故南和伯方炳
的親堂弟方曄先該南京右軍都督府保
勘宗圖供結前來後以爭襲叅送刑部問
明應該承繼伯爵隨經本部審驗

誥券軍功與供結相同似應題
請但襲爵重事係干

恩命臣等未敢擅便伏乞

聖裁等因隆慶六年正月二十四日題二十六

日奉

聖旨方擘准襲祖爵

題行查建平伯孫高添爵疏

驗封清吏司案呈奉本部送吏科抄出前
軍都督府已故建平伯高霽應襲孫男高
添爵奏臣始祖高士文初佐

太祖高皇帝開國創基建立大功繼事

成祖文皇帝靖難爭鋒掃平天下進封伯爵世
世承襲至臣伯祖高霽嘉靖十年病故無
嗣臣父高道興的係親枝輪該襲爵本部

准行本省陝西撫按查明於十九年起送

到部本部本府俱各保結承襲間因病身

故臣係嫡長親男本部行文取臣承襲本

省撫按又行查明結送到部府部保奏明

白於嘉靖三十七年九月內已蒙爲奏襲

矣止因臣家貧被嚴世蕃需索不遂囑逼

該司題稱合無將高添爵量授外衛指揮

一職當時內外諸臣無不爲臣嗟嘆者特

以世蕃可畏莫爲申辯後來者遂拘成案
而使臣含冤抱屈至今也今幸

聖明在上稷契盈

朝臣豈敢忍負

皇祖封拜之

恩泯先臣犬馬之勞而不爲我

皇上一伸辯之乎臣據題稱之言以臣始祖歿

於矢石追贈伯爵似與生前封拜者不同

傳襲四世亦足以酬其勞矣臣竊惟臣祖

自洪武初年從軍渡江征進累有血戰大

功至永樂初年復隨奉

天征討又累有血戰大功不可悉數由小旗歷

陞前軍都督府都督僉事掌管府事永樂

三年

命統大軍征交趾六年平定回還復取李關野

縣鏖戰陣亡當年初二日我

成祖諭平交趾大功進封奉天翊衛宣力武臣

特進榮祿大夫柱國建平伯

賜給

誥券是臣始祖之爵原論生前之功非以陣亡之故昭然甚明且我

成祖見臣始祖開國靖難奮身忠勇超異諸臣特又頒鐵榜載曰朕比經戰場思昔艱危心膽震悼毛髮竦立朕之子孫享有萬年之安爾之子孫亦同享萬年之慶

聖訓諄切如此豈可槩以爲歿後追贈而與生前封拜不同乎况開國靖難功臣世爵載在

國典與

國同休原無四世足以酬勞之說也又稱臣

宗圖在部者功臣底簿開造高士文止三子原無高三一枝陝西開送宗圖却稱高士文四子高添爵高三之後宗派欠明臣請推宗派相傳之由而後及改換之故臣

始祖士文生四子長高福次高成三高三名英四高四名茂福以長子襲爵高成隨

住京師高三高茂原籍守墳福生二子長
高遠次高進福故高遠襲爵遠故無嗣遠
弟高進襲爵進故無嗣輪該二枝高成下
嫡孫高霽襲爵霽故無嗣輪該三枝高三
下嫡孫襲爵臣父高道興的係嫡長子孫
輪該承襲無疑先是臣伯祖高霽有義子
李繼宗於嘉靖九年因霽久病在牀改名
高繼宗暗易宗圖霽故冒行奏襲臣伯祖
母夫人朱氏奏行吏部將繼宗同父高道
興叅送三法司會問將李繼宗斷罪歸宗
准臣父高道興承襲結明病故本部取道
興長子是臣承襲外有本省巡撫都御史
鮑象賢殷學巡按御史姚一元鄭本立布
政使賈應春等二次結保文卷可據內有
掌府事英國公張溶管府事懷寧侯孫秉
元官吏印結可據又本部於嘉靖三十四
年六月內三十六年十二月內勘據無礙
奏明文案可據臣前赴吏部驗封司查對

底簿內開高霽生一子高繼宗此正係李繼宗用計改換者使底簿可據則法司等衙門緣何將繼宗會斷歸宗准臣父道與承襲是宗派未嘗不明也又稱臣祖爵停襲二十餘年今突然

請襲縱使宗派是實亦爲親盡服窮合無將高添爵量授外衛指揮一職夫臣祖高霽病故卽遭李繼宗冒襲之害臣父承襲查勘往返奔走萬里耽延歲月臣父病故起臣到京照例行查又致耽延是雖停襲二十餘年而人文俱已到部原非有違礙而停久也且吏部職掌載功臣襲爵事例並無降襲之說若謂親盡服窮可降自開國至今二百餘年大小武臣親皆盡矣服皆窮矣凡公侯伯皆當降爲外衛指揮而指揮等官又當革爲庶人矣

皇祖山河帶礪之盟有此制乎臣言及於此萬罪萬苦矣近查得豐潤伯曹松嘉靖六年

奏乞襲爵吏部題稱不係開國靖難之功
受封自天順元年承襲三輩似亦足酬要
將曹松減襲奉

世宗皇帝聖旨曹松准襲伯爵又查得伏羌伯
在京子孫故絕吏部題

請仍取原籍嫡次子孫毛桓承襲臣祖高士文
開國靖難之功非曹松之祖可比而臣係
臣祖嫡次子孫正與毛桓相同伏望

皇上體

祖宗優卹功臣至意

開日月照察覆蔭至明

勅下吏部從公查驗如果臣祖功績是實臣宗
派委明別無違礙比照曹松毛桓等事例
准襲伯爵庶先臣犬馬之勞不致無辜而
冤泯我

皇祖券榜之誓垂之億萬載而愈光矣等因奉
聖旨吏部知道欽此欽遵抄出到部送司案查
嘉靖十年十一月該前軍都督府帶俸已

故建平伯高霽先稱嫡男後查明乞養男
高繼宗奏爲乞

恩襲爵以圖補報事內稱高霽於本年七月病
故乞要承襲祖爵該本部覆題奉

欽依備行前軍都督府查勘十一年三月高霽
繼妻命婦朱氏奏爲異姓奸謀朦朧詐冒
襲爵乞

恩辯明等事內稱伊夫前妻鮑氏無出弘治十
七年八月十五日乞養李昂幼子李繼宗
卽高繼宗爲嗣夫臨終遺言行書取原籍
陝西西安府咸陽縣的親枝派姪男高道
興前來承襲不期李繼宗要行詐冒襲爵
妄奏行勘乞要將李繼宗斷令歸宗取姪
男高道興承襲前爵等因併行該府從公
查勘回報以憑議奏定奪隨准前軍都督
府管府事靖遠伯王瑾咨開奏內有名人
證各執異詞俱不歸一難以保勘本部題
准咨行法司勘問定執何人應該承襲高

龔伯爵十二年七月准刑部咨及管府事
靖遠伯王瑾等結送高繼宗前來該本部
看得跡有可疑題奉

欽依行三法司會同錦衣衛并該府官員從公
再行查勘明白取具歸一供結具奏

定奪隨該法司等官勘問得李繼宗的係異子
問發歸宗高道興回籍聽查十六年二月
高龔妾陳氏奏稱伊夫病故絕嗣乞要行
原籍查取嫡派宗枝承襲前爵等因備行

陝西布政司轉行該府縣查勘已故建平
伯高龔原籍有無嫡派宗枝卽今見該何
人應襲定報一人取具歸一親供宗圖并
經該官吏人等不扶結狀粘繳施行十九
年四月據陝西布政司咨呈行據西安府
申繳查勘遇高龔姪男高道興倫序相應
並無爭襲等項違礙情弊并具歸一供圖
官吏里鄰收生人等不扶甘結連人起送
到部本部看得陝西去北京路途遙遠如

有別項情節何以備知必須再行保勘明
實方可題

請就經咨行都察院轉行巡按衙門會委布按
兩司廉明官二員從公體勘去後二十年
正月高露弟婦張氏奏稱高道興在籍病
故遺嫡長親男高添爵年方七歲乞要復
行陝西布政司查照原行勘合事理保勘
高添爵起送承襲祖爵等因復行陝西布
政司查勘二十九年八月又該張氏奏稱
乞將高添爵催勘承襲本部看得久不查
報復催行陝西撫按衙門作速會委查勘
三十年六月據陝西布政司咨呈行准守
巡關內道咨牒據西安府申行據咸陽縣
查得高添爵係高士文五代嫡孫男係高
道興嫡長親男例應承襲前職並無爭奪
之人取具府縣官吏里鄰收生知見人等
不扶結狀及本舍親供世系宗圖轉繳到
司尤恐不的又經駁行守巡該道會同行

委西安府掌印正官親提高添爵戶首里
老鄰佑收生知見人等查審相同呈蒙巡
撫陝西都御史鮑象賢批既經查勘明白
仰司具結起送繳蒙此隨據巡按陝西監
察御史姚一元批高添爵既經查勘無礙
布政司卽具由結送吏部施行繳蒙此合
就起送爲此今將前項緣由繳到親供世
系宗圖結狀理合粘連咨呈到部看得建
平伯爵原不係開國及靖難功勲子孫承
襲已逾四世今其嫡派在京師者既已故
絕而在原籍者世系又已疎遠高添爵縱
係高道興嫡男其於立功之人不無親盡
服絕若擬承襲未免輕濫有褻名器咨行
都察院轉行彼處撫按衙門再查高添爵
既稱高士文五世嫡孫緣何伊父祖數輩
不行隨住京師卽今原籍有無高士文遺
留事跡可據查與軍職年遠不許承襲事
例是否相同勘議停當去後三十三年五

月張氏奏爲懇乞

天恩查明嫡派照例題覆承襲等因又經咨行都察院轉行彼處撫按衙門查照先今事理作速從公勘議三十四年十一月張氏又奏爲懇乞

天恩垂憐貧苦淹滯承襲祖爵事本部又催行陝西撫按衙門作速定委在省公正官員勒限勘取的確根因免致奏人瀆擾三十

六年十二月准都察院咨據巡按陝西監察御史鄭本立呈據陝西布政司經歷司呈蒙付准守巡關內道咨牒呈據西安府申據咸陽縣申准本縣知縣潘應科關稱會同興平縣知縣朱文吊取高添爵始末文卷到官審據里鄰戶首人高道等供稱高添爵祖高懷德洪武以前流移直隸廬州府梁縣與該縣甯家招壻生高士文洪武三年替母舅甯仲殷頂軍隨從

太祖高皇帝征討獲功歷陞都督僉事嫡生長

子高福二子高成三子高三四子高茂兄
弟四人永樂三年三月初四日高士文奏
准復姓永樂四年

成祖文皇帝命征交趾有功回至李關野縣攻
打山寨戰亾本年四月內奉

聖旨特贈戰亾高士文封奉天翊衛宣力武臣
特進榮祿大夫柱國前軍都督府建平伯着
長男高福襲爵給與

誥券食祿一千三百石子孫世世承襲高士文
因前陣亾屍體不全高福等兄弟四人扶
柩歸葬咸陽祖莊之前墓坵并本縣先年
所載誌書照證比時議令高三高茂在籍
看守墳塋高福襲爵與高成隨住京師永
樂七年高福病故長男高遠襲故止生一
子高震風疾故絕高遠親弟高進襲故絕
高福親弟高成嫡孫高鏗襲爵正德十二
年差往蘭州

肅府封王經過咸陽敘問宗枝高三的生長

子高友才生嫡長男高宗義生嫡長男高道興本爵隨令設牲親到墳內拜祭人所共知及將

肅王贈賀軸文一幅止有寶篆亦付高宗義父子節輩收存嘉靖十年七月內高霽故絕伊親弟高霽未襲亦故本爵遺下先未故妾陳氏遵霽遺言於嘉靖十六年奏行吏部勘合行移司府轉行本縣查取高道興係高霽嫡派親枝係高士文嫡次孫倫序相應承襲已經屢次查明具結起送又蒙駁查間高道興病故遺嫡生長男高添爵應合承襲奏行吏部又行查勘因重複委官會勘駁究及因高添爵幼小以此供報前後不同遂將里鄰戶首高景陽等問擬不應罪名呈詳發落委無違礙等因據此職等惟恐不的再三查審詢訪前情無異應合承襲及驗高添爵收捧

誥券併遺留事蹟俱各與前相同竊詳先年所

修咸陽縣誌書內載建平伯高士文咸陽人百年故老相傳亦非一日而士文之孫高霽正德年間曾往蘭州封王道經咸陽自謂原籍本縣白良里人訪求伊祖士文墳坵設牲拜祭鄉里之人衆所共見高霽故絕其妾陳氏遵霽遺言奏保高道興襲爵實非無因而本縣訪集衆聞具結起送似亦有據但蒙部駁所云看得建平伯爵原不係開國靖難功勳今查士文受封

誥券中間悉稱洪武創業永樂南征陞都督交趾陣亡遂封伯爵則開國靖難皆爲有功又云子孫承襲已逾四世今其嫡派在京師者旣已故絕而在原籍者世系又已疎遠高添爵縱係高道興嫡男其於立功之人不無親盡服絕若擬承襲未免輕濫有藝名器今看得高士文若非開國靖難功勳則子孫世遠例當降絕旣於

誥券開國靖難悉稱有功則士文子孫與國同

休實我

祖宗山河帶礪之誓所以報功奉祀服有盡而
恩無窮也又云再查高添爵旣係高士文
五世嫡孫緣何離伊祖數世不行隨住京
師今查高三係士文三子父亡扶襯歸葬
咸陽遂看守墳塋未往京師彼此分業各
不相背又云卽今原籍有無高士文遺留
事蹟可據今查戶人高添爵門前有一大
塚土人相傳爲士文墳墓或云當時陣亡
有身無首往年高霽親至咸陽曾向敘問
拜祭事蹟有可證之一端又云查與軍職
年遠不許承襲事例是否相同今查得軍
職承襲十年之內人文不到部者不許承
襲高道興高添爵人文屢已到部况係勲
爵與例或不相同職等據今查勘所蒙部
駁似有可破除者但守巡二道爲蒙部駁
連委成長二縣知縣魏濟民等嚴行體勘
戶內人衆隨意矛盾申詳批示帖行問罪

前後保勘官吏人役被累頗重今蒙委職
等查勘集衆會審人多稱信事亦不誣通
照高道興高添爵旣經各官屢勘無礙起
送到部近因部駁太嚴遂加究問耽延日
久予奪未定今復行委會審查勘明實查
照先年前案取其圖結起送惟復別有定
奪等因備關申府轉申到道各咨牒呈到
司并取具府縣勘官里鄰戶首收生人等
重甘結狀呈報到職理合備由呈乞轉咨
吏部查照等因到院備咨到部及准巡撫
陝西等處地方都察院右副都御史殷學
咨同前事本部查得見行事例公侯伯子
孫承襲俱行該府保勘無礙方許奏請

定奪題奉

欽依備行前軍都督府委官查勘隨准該府照
會准本府管府事懷寧侯孫秉元咨稱行
拘舍人高添爵在京已故建平伯高霽故
弟高霽長女高氏并親族李文忠高添祿

等到爵從公審勘得高添爵委係立功贈
建平伯高士文五代嫡次子孫並非乞異
之子亦無爭襲之人別無違礙應該承襲
祖爵取到本舍親供宗圖具結粘連及原
封

誥券連人開繳送司查得圖開高士文生子四
人長子高福次子高成三子高三四子高
茂而本司公侯伯底簿內開高士文止生
三子與本舍開報不同呈部行府轉行高
添爵原籍官司弔查宗枝圖譜該府行據
咸陽縣申稱復拘親族知因人高道成高
景學等結稱高添爵始祖高士文歸葬本
縣所生四子長子高福與次子高成同住
京師三子高英卽高三與四子高茂同留
本縣看守墳墓長子高福子高遠高進襲
爵故絕高成孫高霍襲爵因無嗣先年乞
養李昂幼子李繼宗改名高繼宗見得祖
高士文四子內高福高成高茂子孫俱故

絕止有三子祖高三子孫數多遠在咸陽
要得詐冒承襲預謀國子監食糧讀書奏
行吏部勘合底簿止將故絕三枝祖高福
高成高茂開報將祖高英卽高三一枝隱
匿先埋根以圖無人爭競今將本家舊傳
家譜一冊呈送施行等因結由到縣據此
惟恐不的再三卷查責審相同爲照承襲
伯爵一節已經節次屢奉司府查勘明白
具結將高士文五代嫡孫高添爵結文起
送赴部承襲今蒙行查委係高士文三子
高英卽高三嫡派親枝子孫應該承襲伯
爵等因具結并家譜申繳到府備照到部
該本部看得已故建平伯高霽始祖高士
文生前止因征進歷有勲勞後緣陣亡追
封伯爵今已承襲四世似亦足以償其勞
其在京嫡派子孫已稱故絕以致各該奏
乞查取原籍同宗之人起送承襲看係族
屬疎遠圖次欠明節該本部駁行原籍官

司查勘今據該府保送前來但襲爵重事
難以輕議題奉

欽依會同該府兵部及吏兵二科等衙門查議
間隨該高添爵奏爲懇乞

天恩鑒察經府撫按司道府縣勘結五次無礙
特賜承爵以圖補報事本部會同前軍都督府
等衙門掌府事太子太保英國公等官張
溶等查議得封爵以報希世之功世襲以
懋賞延之典使其功在

社稷與

國同休嫡子嫡孫相繼承襲又何容議看得
已故建平伯高霽始祖高士文生前隨征
克捷以小旗歷陞都督僉事尋奉

命從討安南歿於矢石追贈伯爵身後蒙被
褒恤之典似與生前封拜者不同其嫡子高福
嫡長孫高遠次孫高進相繼承襲高進無
嗣乃以高霽嗣襲嫡派相傳已逾四世似
亦足以酬其勞矣高霽故絕以致養子繼

宗詐冒爭襲奏勘無端曾經原籍起送高道興前來未襲身故又將高添爵起送承襲雖有官司勘結但吏部所憑據者惟存功臣底簿查得宗圖開造高士文止生三子原無高英一枝陝西開送宗圖却稱高士文四子高添爵卽高英之後宗派欠明以耳目之所覩記多涉疑似况停襲已經二十餘年今高添爵卽高英之後

請襲縱使宗派是實亦爲親盡服窮合無憫念高士文之功不欲盡泯候

命下之日備咨都察院轉行巡按陝西監察御史親詣高添爵祖居地方嚴加審勘果與士文同族是實徑自具奏

定奪將高添爵量授外衛指揮一職以存高氏宗祀庶昭我

皇上曠蕩之恩而於報功之典繼絕之義兩不廢矣等因題奉

世宗皇帝聖旨是欽此欽遵備行查勘去後續

於三十九年十一月內准都察院咨據巡按陝西監察御史李秋呈據陝西布政司經歷司呈奉本司劄付准本司分守關內道左叅政陳其學陝西按察司帶管分巡關內道屯田僉事塞來譽各咨牒回稱會同親詣西安府咸陽縣白良里大義村高添爵祖居墳墓處所督同該縣知縣周欽涇陽縣知縣朱友達拘集鄰佑魏奉祿高道成等戶首高留等耆老知因高世遠等地方高金等引領查閱詢訪指畫宗圖摘取口詞各執稱高士文係咸陽縣白良里人有誌書存證所生四子長子高福次子高成三子高英四子高茂高士文立功陣亡封建平伯高福襲受伯爵長子高遠承襲故絕次子高進襲高遠伯爵子高震又故絕高成隨京居住生高達高達長子高露係次房親枝襲高進伯爵又故絕次子高靈未襲亦又故絕高英係高福高成親

弟比高士文陣亡之時高英扶襯歸葬因
與弟高茂就居原籍看守高士文墳墓高
茂故絕高英生高友才高友才生高宗義
高宗義生高道興嘉靖四年高霽封

肅府過家相認祭掃見今在京二枝故絕所
有高添爵的係高道興親生長男應該承
襲高霽伯爵等情在官隨吊節年奏行勘
合駁查文卷逐一查審叅詳看得襲封事
體重大覈勘不厭詳復若高添爵是否高
道興之子若不難查但高道興是否高士
文之孫必須有據高英既是高士文所生
自宜隨同高福高成在京居住何獨甘心
原籍世守寒素及高霽之嗣伯爵匪輕其
應承襲者人皆知之自宜睢盱在側縱高
霽慳慳不捨而高道興肯不自往中據且
任彼義男高繼宗有冒襲之舉查奏本原
未坐名却稱原籍尚有三戶卽據高景韶
執稱止此高添爵一戶係是親枝餘二戶

俱皆疎遠旁枝又似互相矛盾及追勘原
賜

誥券并家譜軸文執稱高添爵齋赴京師無憑
查考再據高士文以陣亡得伯高福以長
襲封自宜有祭葬塋碑各色

恩典如何寥寥止一荒塚寘之道傍衰草隨查
誌書止載姓名實行於武烈傳而更不見
於陵墓傳此固其相傳之訛或高氏遠祖
故塚亦不可知若高霽以差便延識族姓
展禮塋園乃其常事此亦未足爲的證也
看得高士文歷陣懋功致身死事我

祖宗錫之伯爵期以帶礪不朽使其宗枝明白
的係有功子孫雖其百世草野自當承廕
以綿功臣宗祀以明

國家恩典一或失真係干匪細所據高添爵
告襲伯爵一節旣無高士文遺留事跡可
據又無高霽生前遺言可憑先後勘官止
以一二鄰佑戶首地方人等在口之詞莫

稜臆揣該本道會審前項人等依違應對
畧似扶同究詰根因絕無指證要知是否
親枝委屬未明事體重大擅難保襲竊意
此中草野世遠無徵原宦所在或有遺事
且高福等旣列職勲位必有世家譜系况
襲爵四世必有貼黃宗派在燕山墳墓必
有昭穆代次原奏本命婦必有的據緣由
又况原賜

誥券俱在京師若就近相叅查考真實自明等
情緣由到職接管卷查先奉都察院勘合
劄付准吏部咨前事移咨備劄前巡按陝
西監察御史崔棟轉行該司委官查勘未
報及又該職復催去後今據前因爲照高
士文立功贈伯委屬年遠至于高霽故絕
停襲斯亦不近所以宗枝不明竟難稽察
今據該司呈稱已該叅政等官陳其學等
親詣高添爵祖居處所勘無遺留事跡根
因指證會審鄰佑戶首人等似有依違應

對扶同等情蓋謂原籍草野世遠無後事
涉可疑難以憑信乞要就近參考原宦所
在遺事與夫接輩襲爵世家譜系貼黃宗
派等項併審在京奏本命婦可得真實一
節不爲無見所據前項襲爵事體委難遙
度卽今應否承授事在彼中本職有礙具
奏等因到院備咨到部看得高霽故絕停襲
年遠其高添爵宗枝不明亦無遺留事跡
根因指證旣經彼處巡按查勘世遠無徵
事涉可疑難以憑信有礙施行立案在卷
今該前因通查案呈到部看得開國靖難
人臣之大勲興滅繼絕

朝廷之重典高士文在

國初時累立戰功旣承封拜其子孫傳之數
世曾無罪犯未奉革除祇緣正嗣之無人
遂致僞宗之冒認李繼宗旣經勘明爲詐
則高道輿例得以次相承緣查高霽故後
京師之派已絕原籍咸陽去京旣遠道輿

勘報未結又已中亾今添爵乃高道典之子稱是士文第三子高英之後節行奏勘矛盾不一在巡撫殷學等則以爲勘明無礙應該承襲在巡按李秋等則以爲世遠無徵難以憑信蓋因累年勘報紛紜以致本部去取靡據至於原擬量授指揮尤爲無謂夫使高添爵果非高士文之後則本係無干卽指揮不得有也而况於襲爵使高添爵果是高士文之後則本無他故自當襲爵矣而因何降爲指揮所以在今日者不當議其爵止當覈其人今高添爵旣復奏辯前來相應再勘合候

命下移咨都察院轉行陝西撫按衙門查照節次勘議事理親詣高添爵祖居地方嚴加審勘高士文遺留事跡果否可據其高英是否士文之子高添爵是否高英之後務在的確明白具奏如其爲真卽當承襲原爵無容別議如其爲假仍當併其指揮革

去不得冒叨庶爵祿不致濫加事體皆得
歸正等因隆慶六年四月初三日題初五
日奉

聖旨是

掌銓題藁卷之三十四



